

四庫全書

史部

欽定四庫全書

史部

欽定八旗通志卷

一百四十六至
一百四十七

欽定四庫全書

欽定八旗通志卷一百四十六

人物志二十六

大臣傳十二

滿洲鑲黃旗十二
素納圖欽保

海蘭察

阿爾

海蘭察

海蘭察滿洲鑲黃旗人姓多拉爾世居黑龍江乾隆二十年以索倫馬甲從征準噶爾先是輝特台吉巴雅爾來降既封為汗旋復與阿睦爾撒納為

逆因大兵追急遁入塔爾巴哈台山海蘭察奮
力窮追射之墜馬遂生擒以歸叙功

賞額爾克巴圖魯號擢二等侍衛尋遷頭等侍衛
命在乾清門行走授職騎都尉加一雲騎尉繪像

紫光閣

上製贊曰烈風掃枯迅其奚難亦賴衆傑摧敵攻堅於
塔巴台射已雅爾是其偉績勇鮮倫比三十年記名
以副都統用三十二年五月領隊赴雲南征緬甸

十二月大兵出虎踞關海蘭察率輕騎行至罕塔
遇賊數十射斃三人生擒七大兵遂薄老官屯賊
乘舡至與江岸土賊合力抗拒海蘭察迎擊殺二
百餘人大兵蹙撤誘賊出海蘭察殿後設伏果有
千餘賊躡追伏發殺賊四百人後數日以五百兵
據渡口列陣有騎象賊目率衆至敗之賊復從猛
密出襲游擊達桑阿營海蘭察赴援大呼衝入賊
竄林莽中海蘭察入林捕殺賊奔新街三十三年

十二月率三百騎出萬人闕夜至夏鳩江遇火光
知有築卡賊衆射殺數人生擒三疾馳至江岸見
賊屋千間督兵迅擊兼拋火彈盡燬之三十四年
授鑲藍旗蒙古副都統十月大兵復攻老官屯海
蘭察偕侍衛奎林先據錫箔以南沿江兩岸賊來
犯者再輒創之使不敢復至尋分率左翼兵直攻
錫箔毀其木柵賊出欲掠左哨燾急擊卻之江路
賊猝來追襲又戮其大半生捉二人歸明年兵撤

海蘭察留防邊隘三十六年調鑲白旗蒙古副都
統會大兵征兩金川

命由滇赴蜀備調遣三十七年六月叅贊大臣豐昇
額自東瑪進攻美美寨賊抵禦甚力海蘭察適至
協同奮擊遂克之美美寨下尚有十三寨與豐昇
額乘勝蕩毀後二日與遊擊李煦等合兵攻賊木
城斬獲甚衆又佔據其旁山岡築守卡三座七月
同總兵牛天昇連破數碉遂各築礮臺晝夜轟賊

貢噶山之左有賊千餘由策卜丹笑下迎擊敗之
賊旋擾侍衛阿爾蘇營海蘭察趨赴殺四十餘人
八月于貢噶山設四伏賊出斬級百餘忽見山旁
有新立賊卡偕副都統哈國興連撲五次而氣彌
奮賊不能支遂據之十月進攻路頂宗沿山溝繞
上山頂又潛行箐中奪取賊卡與副都統額森特
兵合遂破路頂宗及喀木色爾獲大小卡寨五十
碉房三百得

旨嘉獎擢正紅旗蒙古都統十一月由格實廸進奪賊
碉兼審南北兩山形勢乃渡河上南山直撲布喇
克札喀爾二寨而額森特等亦分路克捷共得碉
卡九十遂移大營近逼明郭宗且圖美諾

命交部議叙十二月攻明郭宗時領隊大臣普爾普等
已逼其南海蘭察興哈國興繼至直入寨門寨內
轉經樓旁列小碉賊目督衆守我兵環勦之舉火
焚其樓乘勝直蹙美諾小金川平有

旨授叅贊大臣於是大兵分三路而海蘭察由功噶爾
拉進三十八年二月己巳偕定邊將軍溫福奏言
功噶爾拉高峯賊恃險死守臣探得山後沿北越
兩大溝東行為簇拉角克又沿山溝西行上山為
昔嶺由昔嶺至噶拉依路小而近與其株守功噶
爾拉耽延時日不若分攻昔嶺若得昔嶺則稍留
士卒以綴功噶爾拉之賊而大兵合力趨噶拉依
於事較捷現今額森特等越過功噶爾拉山梁向

簇拉角克前進丙子又合奏言始臣與額森特等
分赴昔嶺約期會合茲臣率兵入北山至蘓克乃
地方奪卡二座殺賊二十餘已將木果木後山佔
據額森特等亦於固木卜爾山奪卡殺賊現在兩
軍合力又得碉卡五殺賊甚多由此前望昔嶺步
步險峻俟雪消人力可施即相機辦理辛巳又奏
言固木卜爾山進抵木果木路險冰滑臣於二月
初旬鑿冰開路一日而至其山前分三足由最北

一條下即接昔嶺之麓是木果木軍營已迴在功
噶爾拉之外據番人指點噶拉依約不過四五十
里三月丁酉奏言昔嶺碉卡雖多其阨要大碉有
十臣等分兵六隊用夜半薦進額森特向其九十
兩碉與臣隊伍近臣即一同攻取其七八兩碉居
險而更大臣仍與額森特合攻自子迄申往來冰
雪中及暮佯撤設伏有四百賊下追我兵同擊
伏起助截殪賊二百尋復取昔嶺第五碉得

旨官兵不避鎗石盡力攻剽均屬可嘉其中海蘭察額森
特尤為奮勇出力著交部優敘四月丁酉奏由達
札克角山奪獲得斯東寨五月辛巳奏攻達札克
角及昔嶺之兵同時用力惟昔嶺左邊與右溝進
者擊賊頗多六月後路賊陷底木達擾及登春營
海蘭察率兵還禦連日敗賊俄而前路大營報警
海蘭察復赴木果木救援至則將軍令撤昔嶺兵
次日木果木大營亦陷溫福歿於陣海蘭察見事

已難支乃令領隊大臣福興整兵出而自殿其後
夜半至功噶爾拉總兵牛天畀營次日并撤功噶
爾拉兵令額森特海祿開路而自與福興普爾普
牛天畀為殿日夕至崇德聞有賊梗路乃屯崇德
次日至美諾與領隊博清額五岱和隆武合營時
海蘭察探知南路僧格宗官兵無恙而副將軍阿
桂方駐營當噶爾拉乃分兵千令額森特由南山
往迎又令普爾普以三百兵邏巡鄂克什諸隘後

二日美諾明郭宗俱失海蘭察退保日隆八月阿桂抵日隆十月

命以阿桂為定西將軍分道再舉十一月海蘭察偕領隊常青普爾普保寧等帶兵八千由達木巴宗北山取道阿噶爾布里壓下別斯滿所至皆捷繼復同富興等從帛噶爾角克底木達布朗郭宗諸處層疊奮攻皆勢如破竹時大兵已復美諾三十九年正月阿桂分兵三隊隊五千海蘭察額森特普

爾普保寧等帶領第一隊自明郭宗進發至谷噶山下埋伏有賊哨五人方上山海蘭察鎗斃其一慮逸去者必通信於賊勢不容緩乃與保寧帶兵二千由喇穆喇穆橫梁繞道驀越而額森特普爾普從谷噶正面進攻乘勝至色依谷山與海蘭察兵對面接應先是海蘭察所繞道已七十八里至是又攻據最高之登古山山徑險滑賊以此自恃我兵手足並用四面同攀竟取之於是與色依谷

聲息時通且望見宜喜山梁矣登古山對峙曰羅
博瓦山亦賊中奇險處也二月普爾普扼其前海
蘭察偕額森特抄其後兵由石罅中節節跳越賊
鎗礮雨集我兵毫無畏憚直循山麓登有二百
賊憑高下壓海蘭察方酣戰額森特保寧等合力
迎擊賊來而復却者兩次俄有賊兵三股冒死衝
突我軍箭無虛發立殪數十餘皆帶箭遁然博羅
瓦前山賊恃險猶守乃偕額森特復從正路仰攻

取之又與侍衛達蘭泰繞攻第四第三兩峯而額森特攻其第二峯俱克之

上以羅博瓦為賊首緊要門戶今全行政得海蘭察察最為出力特授為內大臣三月與額森特福康安等剿得斯東寨甫至寨前賊咆哮迎撲而寨內之賊亦放鎗助勢我兵鎗箭齊發殺賊數十額森特斫破寨門賊紛紛逃竄又追殺十餘人四月賊乘雨霧於山坡添建兩大碉海蘭察亦乘夜雨密率兵

前往立毀其碉

上聞深嘉馬五月攻喇穆喇穆山後額森特等奮上奪
卡二烏什哈達接築柵座賊拚死來奪相持久之
海蘭察突然趨斫賊踉蹌遁六月攻羅博瓦峯下
大岡曰色溯普賊人設六碉互相應援海蘭察克
其中三碉額森特克其左兩碉烏什哈達克其右
一碉賊殲斃殆盡附近平寨一時並得七月取喇
穆喇穆以西大碉額森特望見亦趨色溯普之南

崖賊方驚亂海蘭察先已伏兵遂起剿殺次日並克日則了口後數日攻該布達什諾木城時領隊官達色在其前而海蘭察循左溝繞至其後初為夾攻狀忽奪路衝出與之合兵額森特遠見烟起知海蘭察業經繞出料色溯普右溝賊往救其寨必虛即與富興前後並撲海蘭察望其兵少遣兵往助勝之於是官達色海蘭察額森特三路乘勝聯絡進圍遜克爾宗

諭曰海蘭察倡率官兵攻奪險要洵屬超衆前給額爾克巴圖魯名號令改賞綽爾和羅科巴圖魯並銀三百兩現大兵已圍遜克爾宗其益加奮勉迅奏膚功八月復偕額森特先除山前諸寨落賊所藉為屏蔽者又旁抄遜克爾宗西直逼賊寨我兵人人踴躍有豎梯攀上者有鑿牆穿進者有從坍塌處躍入者賊穴地匿藏不敢出

上聞官兵如此奮勉嘉獎之九月取遜克爾宗水碓斷

賊飲汲然後進攻官寨賊放鎗拋石勢如風雨各
山賊咸來應援我兵兩次奮撲海蘭察左頰受傷
居數日官兵攻遜克爾宗右取其第一寨海蘭察
隨將第二寨佔據

上諭曰海蘭察傷甫平復仍帶兵攻奪堅碉尤堪嘉獎
著阿桂記冊俟攻得勒烏圍一併議叙十月

賞貂帽猓狽馬褂時大兵議改攻日爾巴當噶於是
海蘭察趨上默格爾山梁先從叢箐中繞過賊知

覺競出迎敵海蘭察奮力殺敗即騰上山梁據之
額森特將所得三碉交富興駐守亦踵至山梁合
營時瑚尼爾圖已得日爾巴當噶西峯海蘭察額
森特遂連據其西巔曰密拉噶拉木者乘高俯瞰
克其大寨一石碉四其山之陰即凱立葉官寨也
亦乘勢攻取十一月攻布拉克森及格思巴爾焚
寨落數百所有凱立葉上下附近碉卡掃除殆盡
諭曰海蘭察屢經奮勉超羣著在御前侍衛上行走十

一月復乘黑夜下山溝向格魯克古了口前進崖
礪壁立手足扳援及天明官兵登了口者六百賊
併力支拒我兵勇氣倍增克其二碉循梁壓至桑
噶斯瑪特別遣兵由陡烏當噶趨下沙木拉渠什
爾德諸寨皆攻克凡越嶺扳林轉戰一日夜次日
自革什戎岡及作固頂以往皆勝之斯時五福由
隔嶺望見烟焰交騰知海蘭察已皆得手亦率兵
攻得瑪讓普籠籠各碉于是兩路會合是役也海

蘭察掃清山溝四道山梁五道直逼河岸計獲賊
碉五十寨落三百平碉不計其數凱立葉丹壩彼
此接通风東川一帶之賊畧淨盡矣十二月甲辰
同將軍阿桂等奏言桑噶斯瑪特山足下沿河寨
落若能攻取即可隔河轟賊斷其往來之路臣從
正路進攻而瑚尼爾圖福康安分兩翼旁進賊于
堅碉前又設木城遮護竭力抵禦我兵從柵縫射
入或即拔柵木擊打竟毀其城四十年正月乙卯

奏於甲爾納寨旁設伏仍分兵三隊先上攻撲其
逸出之賊俱行殲殪二月己卯奏攻克甲爾納沿
河諸寨三月甲戌奏勒爾吉博山分為三脚各有
賊碉臣與額森特等共取之五月甲寅奏攻克上
巴木通下巴木通我兵奮勇爭先兼將色爾外安
吉達佳布一帶悉行攻獲直至噶爾丹寺之前百
餘處寨賊無敢有抗拒者戊辰奏攻克得思古席
捲其西北寨落次日又克赤布寨分攻噶爾丹寺

各將弁等破其南五岱隰其東賊夜遁天明焚其
寺以絕奔布爾邪教

上嘉將軍叅贊謂其調度有方六月壬戌奏從舍圖枉
卡繞攻奪據昆色爾及果克多進克拉枯喇嘛寺
及菑則大海丁卯奏章噶上下十餘寨同時克捷
而所得地面頗寬接聯非易謹撥額森特隊內千
兵以供前進庚午奏福康安烏什哈達等攻得寨
卡五十餘處五岱五福等亦得薩木喀爾特成額

等併得各山峯皆與額森特兵合齊向冷角寺追殺直至河沿已壓勒烏圍之上臣海蘭察亦乘勝直赴勒烏圍賊巢分兵圍其兩面八月丁丑奏隆德斯寨落經普爾普等攻得賊之鉛子積地二尺火藥一百餘簍俱行收獲官兵所據地在勒烏圍轉經樓中間已亥奏勒烏圍碉寨高堅前阻大河後負高礮其南為轉經樓又過甲爾日礮橋而南為科布曲與賊寨互為犄角我兵攻之不遺餘力

或頭頂柴捆手推轉而行十五日分派埋伏夜半

攻克

上謂將軍叅贊實心宣力將領弁兵奮勇集事均交部
優叙九月戊辰奏言達思里噶拉宇一帶本進兵正
路因連旬陰雨賊乘隙增礮我兵又多費力不如
改從達烏圍乘其防守未固可期得手而仍留兵
舊路以綴賊勢茲豐昇額所分三路兵一攻甘都
瓦爾一攻德里雅克角一攻鄂羅木幸皆應手而

臣兵已先至莫魯古噶拉字之上與額森特上下
接通十一月己丑奏克西里山梁甲寅奏攻上科
布曲兵分三路丙寅奏科布曲三路俱捷時額森
特別取格隆古海祿別取兜窩皆與海蘭察會集
咸以索隆古山高而險遂合勢仰攻賊棄碉遁於
們都斯得木巴宗及安布魯木等凡賊巢唇齒聚
予鏟平四十一年正月甲戌奏攻克舍齊雍中兩
寺因言噶拉依碉寨高堅鞏固較勒烏園更甚茲

臣海蘭察已抵至河岸日內衆軍圍合水陸俱斷
料賊人萬無逃竄之路既而烏什哈達等由山脊
移柵而下據噶拉依上額森特等由喀爾巴掃寨
落九處跨河截噶拉依左而海蘭察偕福康安普
爾普額森特等斷噶拉依右其餘將領或駐守鄂
覺碩十寨以南或聯絡河西營柵而阿桂豐昇額
更於拉爾古對岸屬之西河布設長圍時寨外旁
近餘卡咸經洗蕩惟札木什克寨獨力拒守於是

將軍使海蘭察耀兵而下賊人望見軍容壯盛皆
出跪降二月四日逆酋索諾木同其衆頭目出寨

就縛金川平有

旨封海蘭察為一等超勇侯凱旋之日

上幸良鄉城南行郊勞禮

賜御用鞍轡馬一匹

御紫光閣飲至賞緞二十端銀千兩遂於

閣中繪像列前五十功臣

上親製贊曰射巴雅爾超授侍衛洊至都統叅畫軍計
堅碉險砦無不克登勇而有謀封侯實應四十三年
授正黃旗領侍衛內大臣四十五年補公中佐領
四十六年三月甘肅撒拉爾回人作亂穴據華林
龍尾諸山甚猖獗時大學士阿桂由河工督兵赴
勦首以海蘭察領隊為請而

上於先數日已

命其乘驛往矣四月至蘭州從龍尾山左右分翼上撲

射斃多賊五月踰水磨溝猝上華林賊大駭傾穴
出聞殲戮甚衆於是賊望見其乘馬出陣輒先驚
竄閏五月率阿拉山馬兵及四川屯練兵取賊四
卡其大卡猶堅守乃單騎曉至五泉山審度賊勢
還向華林溝暫伏偵知卡賊回巢所留無幾急起
趨赴以鈇鏹砌路一擁進卡餘賊不能禦遂擄之
是時

上傳賞諸將荷囊以海蘭察相地進攻特加玉韞著殊

異馬六月遂搗入賊營拋火彈焚其帳房板屋及
積聚奪刀矛器械無算賊退保華林寺死拒我兵
逼寺立柵賊出鬪兩次俱戮之割賊渠首級傳示
各回民

諭曰此次剿滅撒拉爾賊匪海蘭察甚為奮勉著將伊
子安祿授三等侍衛以示鼓勵四十九年六月同尚
書福康安勦甘肅逆回於靜寧縣之底店一舉殲
之遂鋤石峯堡賊窟擒賊魁張文慶等七月

詔擢其子安祿為二等侍衛在

乾清門行走又

賜騎都尉世職即以安祿承襲五十二年臺灣逆匪林
爽文攻圍嘉義縣七月

命海蘭察為叅贊大臣偕將軍福康安渡海勦捕十月
守風大擔門

上念其隆冬滯海上

賜元狐暖帽及順風抵岸復

賜玉如意登岸後三日率巴圖魯二十人至彰化縣之
八卦山審視地勢見賊於山上築卡豎旗駕礮即
趨上迎殺而山下復有賊擁至乃發箭各殪其一
餘警遁

上以海蘭察甫抵臺灣即能用少擊衆俾士氣人心為
之一振

諭獎之十一月己巳同福康安直援嘉義分兵五隊以
義民為兩翼開路進辛未殲賊崙仔頂及崙仔尾

賊出沒竹園蔗田中義民分路焚斫無脫漏者進
鋤牛稠山暨台斗坑諸隘遂抵縣城城中踴躍出
迎歡聲震地乃入城撫輯兼獎其守城義民

上諭曰海蘭察前在金川軍營屢著勞績今復身先士
卒攻透賊圍往來勦殺勇畧過人應晉封公爵賞給
紅寶石頂四團龍補褂用旌勲績於是為二等超勇
公癸酉出城搜捕西自大崙庄迄海岸賊踪既淨
東自興化店至員林又自馬稠山至大排竹所有

賊數悉曳之癸未整兵先勦北路順途刈中林大埔等莊席捲至菴古坑遂收復斗六門要隘乙酉師抵水沙連賊已遁搜山見轍跡急追之有乘馬執旗賊目督千餘賊擁牛車行海蘭寮欲生致執旗者飛箭中其股立時就獲其牛車驚駭賊衆相填壓皆自斃戊子抵大里杙賊巢搗之擒賊目賊黨惟賊首未獲於是遍索番社十二月丁酉由內山平林仔搜至集集埔見賊砦前阻大溪海蘭寮

策馬徑渡軍士奮勇汨而從遂洗其砦追逐十餘里至浩准角焚草藿千間聞匪黨尚據小半天山寨辛亥我兵往滌蕩之由是內山要隘皆官兵防守然海蘭察仍躬巡邊界從東勢角山峯轉出獅子頭打鐵藨及蝦骨合歡諸社至極北之炭窰皆險仄山徑穿林越箐僅容徒步者時時收獲其匿藏餘匪五十三年正月丁卯擒賊首林英文於老衢崎獻俘京師

上眷念福康安海蘭察功勤

親解佩囊二分賜之戊寅回兵至南路由灣裏社勦至
極南之瑯嶠執兇渠莊大田磔於市臺灣南北路
俱平

上諭曰海蘭察屢次督兵甚為奮勇而籌辦一切均能
井井有條著再加賞紫韁并金黃辦珊瑚朝珠用示
優異癸未師旋至郡城海蘭察仍從舊經之鹿仔港
登舟內渡

上命於臺灣郡城及嘉義兩處並建海蘭察等生祠塑
立像貌俾民人望而生惕日久不忘又繪二十功臣
於

紫光閣

上製贊曰勇弗知書謀勝智士匹馬彎弓賊不敢視欲
致活口射令勿死進爵錫服言難盡美五十六年廓
爾喀賊匪滋擾後藏十月

上仍以福康安為將軍海蘭察為叅贊率巴圖魯侍衛

及索倫兵千由藏征勦十二月自西寧出口進至
阿什罕五十七年正月抵多倫巴圖爾具奏途中
雪候及遇水草安營之處以慰

上懷三月行抵後藏四月自後藏偕福康安馳赴拉子
催趙糧運閏四月自拉子前行抵第哩浪古合於
成德軍營奏言沿途寨落被賊匪焚燬番衆多逃
避遠去皆各招徠令其復業是月與福康安分往
絨轄聶拉木詳視地勢定計由濟龍一路進兵於

是蕪程赴宗喀五月癸卯至轄布基距擦木數十
里探知賊寨在山梁高處必能瞭望我兵於是先
遣四隊乘晦夜潛進或繞斷賊後或夾擊兩旁而
海蘭察偕阿滿泰等由中路仰攻黎明踰前牆開
礮門一擁而入賊匪見前礮已失左右四山皆我
兵乃拒守後礮不出我兵聲東擊西礮旁垣而入
短兵相接殺賊目三賊兵二百生擒十餘人將擦
木據守

上賜玉韞及大小荷包獎之已抵瑪噶爾轄爾甲山
梁山下有紅旗賊目率三百賊蜂擁而上我兵暫
伏俟賊至山半忽衝出奪旗殺賊賊且戰且退海
蘭察疾馳下山繞至賊前截擊凡殺賊目七賊匪
二百餘生擒三十是役也海蘭察馬足中鎗

諭曰海蘭察與賊接戰馬匹受傷幸未顛蹶實賴

上天護佑為之額手特賞給行幸常佩護身佛一尊以為
諸事吉祥佳兆海蘭察臨陣勇往是其素性但身為

恭贊所關甚重固當鼓銳直前究宜加意持重也丁
未進攻濟龍官寨寨在崇岡上賊固圍疊石為壘
其高二丈四隅皆有大石礮以相犄角我兵四面
分攻而海蘭察與台斐英阿率索倫騎兵往來衝
擊自丑至亥克之賊被殲者自溺河外計級六百
生擒二百

上賜燧囊削刀烟壺荷佩以獎濟龍之捷丁未由濟龍
前進懸崖夾峙中繞長河攀藤行側徑中次日至

索喇拉山下有石卡我兵直前攻撲賊棄卡而逸
追逐三里是為熱索橋隔岸賊急撤橋板我兵攻
之不及因暫退次日仍向橋卡作欲擊狀密令阿
滿泰等東越我綠山從上流潛渡轉撲橋卡賊駭
奔蹂躪墜河者甚衆我兵盡渡逐至色達木三十
里乃駐

上復賜洋表以獎熱索橋之捷甲寅至察哩頂次日抵
旺噶爾山路彌陡並無剗營之地官兵露宿岩下

凡采入百七十里不見賊旺噶爾西南長河橫亘處曰旺堆過河曰協布魯迤東邛落為克堆寨居賊始多丁巳我兵至旺堆賊扼河抵禦不得渡乃留兵牽綴而從上游縛木濟直薄克堆寨賊出不意大敗燬寨五遂趨協布魯殺賊百而旺堆牽綴之兵亦渡河助殺數十人

上以官兵勤苦露宿設法潛渡連次克捷福康安海蘭察並

賞四喜玉韞鑲嵌松石翎管用昭優眷自協布魯以往
由噶多至東覺山為正路而噶多東南越山曰雅
爾賽拉曰博爾東拉亦可出奇制賊六月庚午海
蘭察用此路繞進晝夜適行至博爾東拉前山見
賊木城三石卡七頗據地勢料直撲未能得力乃
轉從山巔繞壓卡上與阿滿泰高下夾擊盡拔其
城卡乘勝追至瑪木拉望見賊兵埋伏趨前邀擊
又殺百餘人惟時東覺山正路兵乘勝亦至合力

追捕多所斬獲

上嘉之命部議叙丙子至雍鴉山剗營賊具稟乞降片
之七月己亥進攻噶勒拉山三路並捷乘勝窮追
復上堆補木山奪其卡由堆補木下山為怕朗古
橫河賊扼橋拒守大兵奪橋直渡馳上甲爾古拉
山別兵從上游潛渡亦抵集木集山二山本相屬
我兵遂合為一賊來擾者往來迎擊皆敗之凡接
戰兩日夜越兩大山克木城四大小石卡十一奪

據大橋一戮賊目十三人賊匪六百生擒十七於
是賊酋畏懼求降情詞懇切有

詔許納款班師九月海蘭察晉封一等超勇公自藏凱
旋五十八年三月卒於家

賜諡武莊時十五功臣圖像方成

上製贊曰勇而有謀侍衛肅公索倫巨擘黼衣錫龍圖
形四番福祿鮮比旋終於家矜惜無已又奉

諭曰海蘭察由行伍出身在戎陣多年其接戰次數不

可勝記寔不愧宣力之臣茲病卒於家非陣亡者比
例不入昭忠祠但念其軍營奮勉曾受多傷加恩著
亦入昭忠祠以示朕軫念功臣之意子安祿於廓爾
喀從征亦

賜號哈錫巴圖魯

阿爾素納

阿爾素納吉林滿洲鑲黃旗人姓祿葉勒乾隆二
十一年由前鋒隨征西路二十五年還京授藍翎

侍衛二十七年授三等侍衛三十四年隨征緬甸
十月大兵剿新街阿爾素納在事有功授二等侍
衛

賜額騰伊巴圖魯號三十五年赴金川軍營三十六年
十二月大兵攻巴朗拉阿爾素納同侍衛額森特
先登奪賊兩碉中山峯復隨攻山頂碉卡夜克之
大兵遂越巴朗拉嶺三十七年正月分三路攻資
哩阿爾素納同總兵牛天畀由瑪爾瓦爾濟進奪

卡甚衆二月大兵破賊卡賊匿地溝者阿爾素納
搜殺殆盡即駐守南山會叅贊大臣五岱分攻北
山石卡南山阿喀木雅賊潛往援阿爾素納等邀
擊之賊敗走三月移攻阿喀木雅賊夜遁阿爾素
納從南山協勦奮勇進奪沿山數卡賊突來犯擊
敗之尋復由喇卜楚克繞攻資哩南山同牛天界
分兵衝壓以牽賊勢六月大兵三路攻美美卡阿
爾素納由南山溝繞出賊卡後與各隊兵合圍賊

大木柵賊拒敵衝入賊陣短兵鏖戰斃賊數百尋
同總兵李煦樹柵進攻賊二百餘來犯阿爾素納
接戰殺賊甚衆旋同副都統海蘭察夾攻木城斬
賊三百餘因立卡駐守七月擢頭等侍衛八月大
兵至貢噶誘賊出戰阿爾素納等伏兵四路進攻
殺賊百餘十一月進攻兜烏山頂與總兵馬彪合附近
碉卡悉攻克

諭曰此次在事奮勉之頭等侍衛阿爾索納著賞給副都統銜尋授領隊大臣三十八年三月大兵至木果木分六隊乘夜進剿阿爾素納與海蘭察等合攻賊碉自子迄申克兩大碉毀之

諭獎阿爾素納等尤奮勉出力

命優叙時阿爾素納駐守兩山間賊二百餘來援阿爾素納等分兵夾攻多所斬獲追至山脚奪據石卡二復於溝底樹柵進逼賊窟極乘夜來犯我兵奮

擊之賊俱受傷竄聞三月同副都統烏什哈達領
兵五百由達扎克角下攻木城賊百餘人出拒我
兵殺三四十人即據其木城乘勝下壓連克碉樓
一石卡二尋授鑲白旗蒙古副都統四月率兵攻
達扎克角山梁克木城碉卡五伏賊自箐出殲之
隨攻克得斯東寨仍樹柵繼進賊三四百來犯阿
爾素納等剿殺過半五月合攻昔嶺前山木柵阿
爾素納等身冒鎗石殺賊甚衆賊從林後溝中出

斷我歸路我兵力擊之斃賊數十復於達扎克角
高阜築礮臺轟賊傷斃甚多六月木果木大營陷
於賊阿爾素納率滿洲兵撤出行至大壩溝遇賊
力戰歿於陣事

聞

上悼惜之

命照扎拉豐阿例議卹贈都統銜入祀昭忠祠

賜祭葬如例給騎都尉又一雲騎尉世職無子以從弟

尼堪襲後兩金川平

命圖形

紫光閣儒臣擬贊曰攻巴朗拉絕噉先登三軍從之
以是著稱資哩斯當驚若鷹隼大壩殺賊名彰身
殞

圖欽保

圖欽保滿洲鑲黃旗人姓瓜勒佳由前鋒授前鋒
校乾隆三十二年隨將軍明瑞征緬甸屢著功績

欽定四庫全書

卷一百四十六

賞戴孔雀翎三十三年大兵剿蠻結賊匪大捷圖欽保
在事有功授三等侍衛

賜法福禮巴圖魯號三十五年遷健銳營副前鋒叅領
三十七年二月隨將軍阿桂征金川十一月大軍
造皮船乘夜渡河分三隊襲烏達西山礮卡圖欽
保同總兵王萬邦由東面進攻木城石碕同時克
獲捷

聞得

旨嘉獎授額外叅領復與侍衛三寶等合兵至邦甲山
梁緣溝登山出賊後克石城大碉及各石卡乘勝
下夾攻賊潰竄十二月抵納圍納扎木副將軍明
亮等分兵三路圖欽保與遊擊谷生炎等合攻山
坡石卡克之時賊方悉力拒守石城圖欽保復偕
侍衛德赫布千總劉世勲等三面合圍壘石卡逼
之賊棄城夜遁大兵至僧格宗圖欽保由河西科
多渡橋攻河東賊掘斷山路官兵奮勇進至喀咱

木籠山梁抵奢壑賊潰奔美諾三十九年圖欽保
同叅領拉布棟阿率兵五百攻馬奈克之叙功擢
湖南長沙協副將四十年大兵抵薩克薩谷其北
曰茹寨麥方熟賊設戰礮抵死衛護圖欽保領兵
由薩克薩谷力攻克之焚沿河各寨賊竄出前後
受圍中箭被鎗及墜河斃者無算麥田十餘里皆
為我兵所據事

聞

諭曰圖欽保攻剽茹寨尤為出力著交將軍等記名遇
有軍營總兵缺出奏請補授七月大兵分二路攻石
直嘴山下木城圖欽保由左路繞過木城燬山下
賊寨賊駭竄閏十月攻克扎烏古山梁圖欽保在
事有功得

旨功加一等十二月擢陝西固原總兵四十一年凱旋
命圖形

紫光閣

御製贊曰承平日久敢恃內安永憶文子厥有名言嘉
我諸臣遇兵則奮竭力敵愾世承家訓四十六年三
月撒拉爾逆回因爭教倡亂蘭州圖欽保率兵五百
助剿至則與總兵德寧等擊斃多賊旋偕總督勒
爾謹提督仁和等守城頃之大兵四集賊退據八
蜡廟及水磨溝掘濠築壘以固拒四月圖欽保同
都統海蘭察率兵越水磨溝由山梁進逼賊巢賊
衆從山坡撲上圖欽保持刀奮砍馬蹶墜山下被

傷卒事

聞有

旨圖欽保奮勇剿賊臨陣捐軀殊堪憫惻著照陣亡例
議卹尋

賜銀七百加贈三級

賜祭葬如例入祀昭忠祠授其子藍翎侍衛明昌都司
銜擢為三等侍衛

欽定八旗通志卷一百四十六

欽定四庫全書

欽定八旗通志卷一百四十七

人物志二十七

大臣傳十三

滿洲正黃旗一

揚古利

楞額禮

納穆泰

額爾德尼

恩格德爾

希福

明安

敦拜

索尼

希爾根

揚古利

揚古利姓舒穆祿世居渾春後隸滿洲正黃旗父
郎柱為庫爾喀部長傾心歸附

太祖高皇帝厚遇之

命其子揚古利入侍郎柱為部人所害圍其家其妻負幼
子納穆泰於背射衆突出以其族來歸未幾庫爾
喀舉部內附揚古利察知部人之殺其父者手刃
之時年甫十四

上深異之日見信任且尚主焉始令守汛江上警備嚴密
無敢犯者征輝發多壁城阻大水衆難之揚古利
率先逕渡大獲而還取訥殷部及朱舍里安褚拉

庫等路皆有功從征哈達擒其貝勒孟格布祿丁
末年遷蜚悠城戶口侍衛扈爾漢率兵三百禦烏
喇兵萬人方據山各結營相持揚古利勵衆曰吾
儕平居相謂與其死於疾無寧死於敵此非臨敵
時乎持矛突入斬烏喇兵七人敵稍却諸貝勒兵
踵至併力奮擊大破之征輝發城及赫席黑木倫
等路衝鋒奪險常為衆先戊申年從征烏喇金州
城城中拒命冒矢石攻克之癸丑年再征烏喇攻

青河敵勢甚銳

太祖遣使持矢召諸將退揚古利獨麾衆薄城疾攻拔之
從擊明兵於界藩破其軍進擊尚間崖之兵有

旨令被傷者勿行揚古利獨裹創率十佐領兵憑高馳擊
大破之天命六年大兵取瀋陽遼陽皆先登陷陣
既定

上嘉揚古利績且憫其傷痍

命位次八貝勒下統左翼兵授一等子世襲魚

諭勿更臨戰陣十年明總兵毛文龍兵三百人夜入耀州
復率兵殲其衆天聰元年從征朝鮮有功三年九
月同副都統阿山緝逃人至雅爾古遇文龍所遣
採獲者斬九十六人擒千總三員從者十六人以
歸是月

太宗統大兵征明揚古利率護軍兵敗明總兵滿桂軍於
都城之北十二月師還畧通州火其船遂取張家
灣明兵來援薊州我兩紅旗護軍兵少却揚古利

鼓勇直前明兵敗奔

命以兩紅旗規避各員贖罪物賚予之揚古利即以分諸將士四年率兵略錦州義州六年

太宗親征察哈爾

命同貝勒阿巴泰等留守七年六月

上以討明及朝鮮察哈爾三者用兵孰先

詢諸大臣揚古利奏宜深入明境朝鮮察哈爾自當歸順

且極言用兵之不可緩

上於是決意征明八月

命率兵往略山海關八年五月晉超品一等公仍管六佐

領事世襲不替

賜敕免死罪三次八月從攻大同宣府拔靈邱縣斬其知

縣守備官崇德元年與武英郡王阿濟格等帥師

直入明境攻克關隘下昌平等十二城五十八戰

皆勝俘獲億萬計二年

太宗親征朝鮮其金羅忠清兩道兵來援營於南漢城會

天大雨雪晝晦揚古利從豫親王多鐸進擊之追及山嶺有朝鮮敗卒竄伏崖側竊舉礮中揚古利傷重而卒年六十有六揚古利厯事

兩朝恩寵極隆

太宗嘗命護軍為之守門

賜豹尾槍二令親軍佩之甲卒二十人為之衛其卒於軍也

太宗解御衣衣之哭之慟親視含斂以葬復

臨奠醑為置守塚是年十一月追封武勲王建碑墓道順

治中配享

太廟

聖祖復

御製碑文紀其功雍正元年加號曰武誠子二人長阿哈

旦以軍功授雲騎尉次塔瞻襲超品公擢置內大

臣崇德六年八月

太宗親禦洪承疇援兵於錦州敵遁

命塔瞻往高橋設伏追擊斬獲甚衆尋以

上移營松山時明總兵曹變蛟棄寨宵遁我兵擊之其敗

軍突入

御營塔瞻不能督衆守營降為一等公改

賜敕為免死二次順治四年卒子愛星阿襲別有傳

楞額禮

楞額禮滿洲正黃旗人姓舒穆祿揚古利次弟也

自少從

太祖高皇帝征伐敘功授騎都尉世職累晉一等男任正
白旗副都統天命九年明將毛文龍縱兵渡朝鮮
義州城西鴨綠江入島中屯田楞額禮奉

命率左翼兵同右翼副都統吳善襲之途中獲諜者知明
兵晝則渡江入島收穫夜仍回宿江岸楞額禮遂
乘夜引兵由山間潛行平旦度明兵已渡江即突
馳至其島明將士大驚奔潰追斬五百餘級餘衆
爭舟盡墮水死焚其島中積聚而還

太宗文皇帝即位楞額禮列十六大臣尋任正黃旗都統
為八大臣偕叅領阿山率兵六百人往畧喀爾喀
巴林地擒其貝勒十四人俘獲甚衆

上嘉其功率貝勒大臣迎勞之晉爵三等子天聰元年隨
大貝勒阿敏等征朝鮮率兵八十人乘夜襲明斤
堆六所盡獲其哨卒既至朝鮮攻克義州城晉一
等子三年二月明人由海島移駐朝鮮鐵山楞額
禮率精兵剿之斬馘無算九月隨其兄揚古利率

兵往雅爾古追捕逃人遇毛文龍部下採獲軍士擒殺數十人以歸五年三月

上以書諭八大臣疏陳政事得失楞額禮奏言臣以微賤之身擢居大僚

皇上所行果有闕失豈敢緘默不言若無過舉臣又何所指陳自今以後願罄所知以抒忠悃知而不言惟天鑒之至於治民使無偏枉怨由何生臣惟有省躬自誓秉公聽斷以仰答

聖意而已五月同都統喀克篤禮分統左右翼兵徃征南海島有功八月從大軍征明圍大凌河城率本旗將士軍城北面之西

上招明總兵祖大壽降大壽遲疑未決先遣其部將韓棟來謁出楞額禮所守門楞額禮令軍士戎服執戟林立營門內外森嚴堅整棟既謁

上遣使送之歸將入城楞額禮呵之止門外問姓名審形貌然後令入棟目擊軍威及城守嚴整狀還白大

壽大壽降志始決七年應

詔陳軍事言宜先率外藩蒙古及本國兵直抵明內地資其糧草牲畜再整師奪山海關既入關即屯駐關中多積芻糧以備往來攻伐之用此時若不速圖遷延歲月則彼先有備進取轉難至於朝鮮姑與和好若內地既得朝鮮自為我有也六月隨貝勒岳託等率右翼兵取明旅順口凱旋

上迎勞如初八年正月卒

上親臨其喪哭之慟明年

巡幸盛京北山道經其墓

躬下馬奠而哭之順治十二年追謚武襄子穆成格襲爵

歷官刑部左叅政見大臣表

納穆泰

子阿拉密

納穆泰滿洲正黃旗人姓舒穆祿揚古利第三弟

也自少從

太祖高皇帝征伐累著勲績

太宗文皇帝即位擢為八大臣授本旗都統天聰元年隨
貝勒阿敏等征朝鮮以功得優賞三年

太宗親統大兵伐明令納穆泰率兵攻遵化城北面之西
克之四年春同都統圖爾格守灤州明監軍道張
春等來攻城納穆泰與圖爾格分兵守禦矢石齊
發出精銳繞城轉戰擊敗敵兵驅之壕外敵復突
至攻納穆泰所守門焚城樓有執纛立雲梯登城
者我兵阿玉什斬之奪其纛敵兵稍却會貝勒阿

敏等怯不赴援敵兵發礮攻城我兵力不能勝遂
奔永平隨阿敏棄城歸六月論罪納穆泰坐敵兵
復至時不率兩旗將士擊敵及奔永平不能全軍
以還又阿敏退歸不行力阻罪應死

上命免死革職籍其家五年同正紅旗理事大臣布爾吉
入明邊緝捕逃人攻拔臺堡獲明哨卒還遇逋叛
者斬六人執九人以歸是時明寧遠人張士粹等
來降詭言明築大凌河城工竣納穆泰與圖爾格

奉

命率兵千人往覘虛實俘獲而還且奏士卒等姦詭狀遂
誅之尋擢兵部承政授三等輕車都尉世職復同
圖爾格率兵略錦州松山俘獲甚多八年從征明
入上方堡略朔州軍至大同攻王家莊納穆泰先
登有功九年

詔統右翼兵隨睿親王多爾袞等往取察哈爾林丹汗子
額哲我兵自應州赴平魯衛城內出馬步兵五百

列陣邀戰納穆泰合左翼圖爾格兵衝擊破之追斬百餘人敵又糾合潰兵數百據堡列營納穆泰率衆奮擊盡殲其衆敘功加三等男是年十月卒子阿哈連襲阿哈連積戰功授騎都尉加一雲騎尉以其兄阿拉密襲三等男阿拉密緣事降為一等輕車都尉順治九年從征湖南擊孫可望於岔路口力戰陣亡

卹贈復為三等男

額爾德尼

額爾德尼世居都英額姓納喇

太祖高皇帝時來歸隸滿洲正黃旗

賜號巴克什每從

上征討蒙古諸部能因其土俗語言文字傳宣

詔令招納降附著有勞績天命三年

上親征明取撫順師還明總兵張承蔭自廣寧糾衆追躡

額爾德尼同諸將還擊敗其衆斬承蔭敘功授男

爵初己亥年二月額爾德尼奉

命同理事大臣噶蓋創立

國書噶蓋奏曰蒙古字傳習已久難以更製

上曰我國之語必譯為蒙古語讀之則未習蒙古語者不能知也柰何以我國語製字為難反以習他國語為易耶額爾德尼奏曰更製之法臣等未能明故難

上曰無難也以蒙古字合我國語音聯綴成句即可因文見義矣會噶蓋以事伏法額爾德尼遵

上指授獨任擬製奏

上裁定頒行

國書傳布自此始額爾德尼既卒

太宗文皇帝復命儒臣達海庫爾禪等述其義而增益之

天聰七年

諭文館諸臣曰額爾德尼遵

太祖諭創造國書乃一代傑出之人今也則亡

世祖章皇帝順治十一年追謚文成子薩哈連官至鑾儀

衛冠軍使改入大學士希福族中

賜姓赫舍里

恩格德爾

恩格德爾姓博爾濟吉特世居西拉木楞

太祖高皇帝創業時喀爾喀蒙古自分五部争相雄長恩

格德爾為巴岳特部台吉歲乙巳首先來朝獻馬

二十

上優賚遣之明年率五部使臣獻駝馬奉表尊

上為神武皇帝自此朝貢無間天命二年尚貝勒舒爾哈

齊女為額駙九年請率部衆來歸

上嘉其輸誠最先予宥罪券

遣大貝勒代善等統兵移之遼陽

賜鞍馬貂裘及田宅器用與其弟莽果爾岱並授爵三等

子子囊弩克滿敦等

賜裘服授職有差隸滿洲正黃旗

太宗文皇帝天聰三年同都統武訥格等率兵征察哈爾

招降二千戶尋從

上征明入龍井關克遵化城薄燕京

上親統師駐德勝門外明寧遠巡撫袁崇煥錦州總兵祖大壽合衆二萬赴援屯於城東南

上命分軍進擊恩格德爾率外藩蒙古戰失利卻走會武
訥格率兵突前奮擊乃敗敵于是集議恩格德爾
不嚴整隊伍縱騎驟進致敗罪應罰鍰奪俘獲並
削爵

上念其率衆歸順功免削爵明年春大軍克永平

上駐蹕城中恩格德爾奉

命略地遇明步卒三百將戰復有敵騎三千自玉田縣突

出恩格德爾佯退誘敵敵稍前疑有伏還走因追

襲其後獲馬百五年大軍圍大凌河城明監軍道

張春總兵吳襄等合衆四萬自錦州赴援

上親督兵擊敗之敵初接戰時鋒甚銳我右翼兵獨先衝

入張春營左翼兵避驍矢進擊稍緩因論臨陣退

縮諸將罪恩格德爾應罰鍰削爵

上復免其削爵罰鞍馬一白金百兩崇德元年五月卒以

其第四子額爾克戴青襲爵

世祖章皇帝順治十二年追謚恩格德爾曰端順視一品

大臣例立碑墓道

世宗憲皇帝雍正七年追封三等公加號順義額爾克戴

青初任侍衛授三等輕車都尉世職既襲其父三

等子以所授職予弟索爾噶襲順治二年以額爾

克戴青素荷

太宗眷顧晉二等子七年春睿親王多爾袞欲額爾克戴
青附己令大學士剛林等許以改入正白旗當晉
封三等侯額爾克戴青不從明年

世祖親政嘉其守正不阿超晉一等侯九年列議政大臣
管鑾儀衛事尋擢領侍衛內大臣遇

恩詔晉二等公復因索爾噶卒以其職仍與額爾克戴青
併襲晉一等公十年同內大臣鄂齊爾等以佐領

敦達禮岱敏互訐事奏請下刑部鞠訊刑部袒岱敏坐敦達禮削職罰鍰敦達禮訟寃得釋部臣及奏請諸臣並坐徇降革有差額爾克戴青降爵二等公十四年加少保兼太子太保十六年以家僕陳保毆侍衛阿拉那於市反誣阿拉那持刀擊人額爾克戴青坐縱徇革世爵加銜罷議政及領侍衛任專留內大臣銜以所襲恩格德爾之三等子予其兄二等輕車都尉囊弩克併襲為二等伯

十八年六月卒

賜祭葬如例謚勤良康熙六年仍改囊努克為二等輕車

都尉以額爾克戴青之子岱壽襲二等公

希福

希福姓赫舍里曾祖穆瑚祿祖特赫訥父瑚什穆
巴顏世居都英額再遷哈達

太祖高皇帝既滅哈達希福從其兄碩色率所屬來歸以
通滿漢蒙古文字

召直文館屢奉使諸蒙古部

賜號巴克什文字之任一以委之後隸滿洲正黃旗天聰

二年九月

太宗文皇帝親征察哈爾令往徵科爾沁兵還土謝圖額駙奧巴止之曰寇騎塞路行將安之即有罪譴吾執其咎答曰

君命安得辭死則死耳事不可誤也遂行再宿達大營復命曰科爾沁兵不赴調土謝圖額駙奧巴已率兵

他往侵掠畢然後來會

上怒復遣壯士八人隨之往促其速赴調行四晝夜至一小屯遇敵擊殺三十餘人卒達科爾沁所以其兵來會明年奧巴至

上命希福與館臣庫爾禪等責讓之奧巴服罪獻駝馬以謝敘功授騎都尉世職復以從征燕京敗明兵於北門外大凌河之役同都統譚泰等爭先奮擊錦州援兵師還敵兵襲我後又擊敗之晉三等輕車

都尉崇德元年改文館為內三院希福為國史院承政尋授宏文院大學士晉二等輕車都尉是年請定察治訛言惑衆之例三年與大學士范文程請更定部院官階之制

詔並可其奏希福雖居內院筦機務猶間奉使察哈爾喀爾喀科爾沁諸部編戶口設佐領頒法律於蒙古平其獄訟或往來軍營宣示機宜核功賞相度形勢諭

上德意於諸降人還奏未嘗不稱

旨也順治元年繙譯遼金元三史書成奏進

世祖章皇帝展閱再四賞賚有加時都統譚泰附睿親王
多爾袞希福素譏譚泰衰慵又以所得分撥第宅
二區相隔甚遠囑譚泰更易之譚泰不允希福使
人謂之曰爾為都統即為我更撥一屋有何不可
而不能爾誠衰邁矣譚泰銜之會譚泰弟副都統
譚布詣希福希福曰日者大學士范文程以堂餐

華侈語我我對曰吾儕儒臣也非六部大臣及功
勲大臣比安得盛饌若此遂偕往啓王王以予言
為然且自咎曰吾過矣譚布退以告譚泰譚泰計
之法司希福坐偽傳王言詆譏大臣欲搆釁亂政
應論死讞成啓王王令免死革職罷任尋籍其家
八年二月

上親政雪其寃復職給產仍授宏文院大學士九年正月

充纂修

太宗實錄總裁官二月充會試主考官遇

恩詔晉三等男又奉

特旨以希福為

太祖

太宗任使銜

命馳驅能盡心力嘉其功晉一等男又遇

恩詔加一雲騎尉復以定鼎燕京時希福方罷任未獲加

授世職至是特晉為三等子世襲十月授議政大

臣十一月病卒年六十有四

贈太保謚文簡長子竒塔特襲爵次子帥顏保別有傳

明安

子昂洪多爾濟

明安姓博爾濟吉特初為蒙古烏魯特部貝勒

太祖高皇帝天命二年遣使獻駝馬七年率所屬人戶來歸予三等子爵別立烏魯特蒙古一旗

太宗文皇帝天聰三年同都統武訥格額駙恩格德爾等率滿洲蒙古兵征察哈爾降其邊境二千戶五年

從

上征明圍大凌河城明總兵祖大壽以兵出犯我臺堡明
安同都統和碩圖等率兵夾擊大敗之既而我軍
偽為明兵赴援狀以誘大壽出戰明安同兩翼都
統齊進奮擊大壽敗卻尋率衆降明安得

優賚六年從

上征察哈爾師還以俘獲數少又弗即遵

諭歸隸戶籍且擅以官牛與其下蒙古及私匿在逃蒙古

二人諸罪部議應革世職罰鍰奪俘獲人口及

賜物

上念其前此先衆來歸免革世職改隸正黃旗滿洲

世祖章皇帝時三遇

恩詔晉爵至二等伯順治十一年卒幼子朗素襲爵

世宗憲皇帝時追封明安為一等侯加號恭誠明安之長

子昂洪初隨父來歸予三等輕車都尉世職天命

十一年隨征巴林部及扎魯特部天聰五年從征

大凌河俱有功超晉三等男

賜號達爾漢和碩齊順治二年晉二等男七年卒子鄂齊
爾襲爵由侍衛累官至領侍衛內大臣十四年卒
賜謚勤恪祭葬如例明安之次子多爾濟亦隨父來歸予

騎都尉世職尚郡主為額駙天命十一年隨大貝
勒代善等征扎魯特有賊人巴魯克竊馬遁多爾
濟追及擒之尋隨征棟奎及克什克騰等處又隨
征朝鮮並有功天聰五年始設六部以多爾濟為

刑部承政理蒙古事六年以直

御前失儀又奉

命選取獵戶不當部議削世職

上特宥之罰白金百兩八年八月從征明大同

上命前鋒統領圖魯什烏拜分率左右軍以多爾濟領中

軍擊明總兵曹文詔大敗其衆追至城下獲馬百

崇德二年授內大臣並預議政四年隨鄭親王濟

爾哈朗略錦州陣斬三人獲馬三匹六年

上征明駐師松山杏山之間多爾濟同內大臣宗室錫翰

奉

命伏兵高橋明杏山兵千人以糧不繼潛遁伏發敗之追至塔山斬獲甚衆尋以圍松山時明總兵曹變蛟率兵夜犯

御營多爾濟未及禦敵所領侍衛護軍巡守不嚴議罪繫三日罰白金五百兩仍敘高橋敗敵功晉爵一等男順治二年以多爾濟素荷

太宗眷顧晉三等子五年卒弟綽爾濟襲爵

敦拜

敦拜滿洲正黃旗人姓富察其先世居沙濟父本科理當

太祖高皇帝時來歸有朱舍里部長尤楞額梗化不服命同鄂佛洛總管達賴往征之有功

賜號蘇赫巴圖魯管佐領事尋卒子三人敦拜其長也初任佐領天命十一年從大兵征明寧遠先驅偵敵

擊敗城中出戰兵師旋遇敵二十人與步戰盡殲之敵復以騎追射我師敦拜還擊卻敵殿後以歸天聰八年

太宗文皇帝嘉其克副任使授騎都尉世職崇德五年擢護軍統領隨鄭親王濟爾哈朗圍明錦州敵出城誘戰敦拜突入其隊斬三人餘衆俱遁敵騎自杏山一再來犯並戰卻之六年復圍錦州明總督洪承疇自松山遣兵犯我兩紅旗營敦拜先後率所

部禦卻尋復來犯我外藩蒙古營敦拜趨援敗敵
斬首二百餘級獲其雲梯十四七年敘功加一雲
騎尉八年同護軍統領阿濟格尼堪率兵駐防錦
州

世祖章帝順治元年隨大軍入山海關擊敗流賊李自
成兵追至望都二年敘功晉世職二等輕車都尉
先是自成敗遁還西安明福王朱由崧自立於江
南

上敕豫親王多鐸征江南取道河南先除自成賊黨敦拜率護軍以隨師至陝州賊將劉方亮領兵千餘來犯敦拜同護軍統領圖賴阿濟格尼堪等奮擊敗之賊復夜襲我營敦拜率兵連敗賊衆遂破潼關進定西安自成由商州遁走湖廣敦拜同護軍統領阿爾津等追斬三百餘人豫親王移師下江南敦拜復從破揚州趨江寧朱由崧聞大軍至遁走蕪湖將登舟渡江敦拜追及之與阿爾津圖賴等

扼據江口截其去路明將黃得功迎戰我兵奮擊
盡奪其舟得功中流矢死由崧為其總兵田雄等
執以獻三年敘功晉世職一等是年隨端重親王
博洛由浙江進征福建同副都統珠瑪喇擊敗偽
總兵黃某等拒戰兵五年隨征南大將軍譚泰討
江西叛鎮金聲桓賊黨踞九江府敦拜先驅直抵
城下敗賊衆聲桓與其黨王得仁糾步騎七萬自
南昌迎戰敦拜合兵奮擊敗之復招撫臨江一府

四縣六年奉

命統兵勦畿南土賊斬賊渠李玉三陳金玉邢少川吳臨
瑞席快等獻縣雄縣任邱寶坻諸邑土賊悉平七
年五月敘平定福建江西功晉爵三等男尋隨睿
親王多爾袞獵於中後所以同都統噶達渾等私
行射生降一等輕車都尉明年

上親政復爵如故九年遇

恩詔晉二等男十一年朱由榔將李定國自廣西犯廣東

上遣珠瑪喇為靖南將軍以敦拜佐之統兵往征時定國
擁衆新會據山谷立寨平南王尚可喜先以兵防
禦未及戰敦拜同珠瑪喇至遂合兵進剿破賊巢
斬獲甚衆復追至橫州江岸定國遠竄獲象十有
六馬二百餘所陷郡邑悉復凱旋敘功晉爵二等
子得

旨從優再議晉一等子會有疾乞休

上念其勤勞年久加太子太保以原官致仕十四年起為

盛京總管十七年正月卒

賜祭葬如典禮謚襄壯無子以從孫瑚錫布為嗣襲爵

索尼

索尼滿洲正黃旗人姓赫舍里父碩色大學士希

福兄也

太祖高皇帝時碩色自哈達部挈家來歸

太祖以其兄弟父子並通

國書及蒙古漢人文字咸擢置文館理事

賜碩色希福巴克什號授索尼一等侍衛使出扈從隨
軍征討時哈達兵犯界藩城索尼身先士卒擊敗
之復隨征棟夔蒙古援兵雲集立二寨互為掎角
索尼與諸將合兵攻勦拔其一寨餘衆悉降天聰
元年從

太宗文皇帝攻錦州遇明兵千餘徙大凌河戶口索尼以
二十騎襲擊之多斬獲旋偵敵寧遠城內兵突出
索尼奮勇力戰追擊敵兵至壕而返二年

上親征喀爾喀徵兵外藩科爾沁不至既

遣希福率健士八人往趣之復

詔索尼與侍衛阿珠祜齎

諭飭責土謝圖額駙奧巴初奧巴為台吉入朝

太祖以貝勒舒爾哈齊孫女妻焉既而奧巴屢違令約私

與明通時復徵兵不至索尼於是稟受

方略以行既入科爾沁其部人饋以牲索尼麾之去曰爾

汗有異心爾物安可食耶部人以告奧巴奧巴病

足居別室索尼與阿珠祐詣見公主以

諭旨告奧巴聞之扶掖至佯問曰此為誰索尼曰吾儕
天使也爾有罪義當絕今特以公主故使來謁問耳奧巴
語左右具饌索尼阿珠祐不顧而出奧巴恐使台
吉塞冷等請其事索尼出

璽書示之即令從者先行奧巴得書大驚令所屬大臣環
跪請曰汗獲重罪甚惶懼今寇騎塞路恐使者即
歸遭侵掠益滋汗咎請少留索尼曰銜

君命而來死何足辭與阿珠祛拂衣起整轡欲行衆皆泣
且曰汗欲引罪自謝扣馬首力挽之乃止翼日奧
巴辭以足疾欲令其台吉拜思噶爾及桑噶爾寨
偕索尼等入謝索尼曰汝欲解已罪而使二人行
吾豈為取拜思噶爾等而來耶奧巴乃使人請曰
上怒我我固應肉袒謝懼不我容而逐我耳索尼曰

皇上覆載如天地汝果引慝入朝雖有罪必蒙

矜恤奧巴叩首決計入朝索尼見其悔罪輸誠與阿珠祛

偕其大臣黨阿賴先歸奏狀俱稱

旨三年從征明至燕京明寧遠巡撫袁崇煥等赴援列營
於城東南索尼奉

諭傳令左翼迎擊貝勒豪格先馳入陣敵兵蹙之矢石如
雨索尼躍馬突入東西衝擊斬殺甚衆遂拔貝勒
於重圍明年正月大軍至榛子鎮城內無官守索
尼同文臣達海頒漢字

詔諭降其民復招撫沙河驛越日拔永平與達海等奉

命執黃旗於城上以漢語遍諭軍民皆歸順二月班師隨
貝勒阿巴泰等率將士守永平五年正月朝鮮使
臣朴蘭英來朝

賜其王侵蘭英以賞薄辭索尼與叅領英俄爾岱等斥責
之蘭英懼拜

命七月擢吏部啓心郎從征明園大凌河城明兵自錦州
赴援索尼持短兵步戰敗之九月奉

命往瀋陽宣布捷音踰月偕叅將祝世昌率漢軍千六百

人及朝鮮使臣至軍營十二月與達海等奏定元旦朝賀儀制明年從征察哈爾由大同入明邊取阜臺寨會六部官署工竣

上召索尼及諸啟心郎

諭以啟迪諸貝勒俾勤事改過毋曠厥官八年以索尼任職吏部事無闕失授騎都尉世職仍與學士羅什等日直內院凡宣示

諭旨及察審功罪咸當

上意值有

旨以郡王禮祭貝勒岳託吏部尚書阿拜誤以岳託子襲
封郡王傳語都統葉臣事

聞下廷臣議誤傳

詔旨罪以索尼任吏部郎官應連坐論罰鍰

上曰索尼未經奉

旨豈肯妄言

特命免議崇德八年考績超授三等男

世祖章帝順治元年都統和洛輝等訐告肅親王豪格
言詞悖妄王坐廢為庶人

詔王大臣集衆宣示以索尼忠貞戮力不附肅王與都統
譚泰護軍統領圖賴並

賜鞍馬二年晉二等子是時睿親王多爾袞攝政以索尼
既列子爵不宜復列郎官令解啟心郎任仍理部
事先是索尼叔父希福以不附睿親王為譚泰構
罪劾罷未幾索尼發譚泰隱匿

諭旨事譚泰亦坐削公爵有求古琴於索尼者索尼於庫內取漆琴與之索尼又嘗令僮從於

禁門橋下捕魚見庫院草長使牧者秣馬院中譚泰遂臚狀劾索尼下法司勘訊論死睿親王奏從輕典削世爵永不敘用遂罷廢三年正月圖賴劾譚泰事涉索尼逮問圖賴曰譚泰有罪吾於途次作書致索尼使啟睿親王索尼不以啟聞及訊齎書者塞爾特曰書達索尼索尼囑我勿言也諸大臣

論索尼罪當斬王親鞫之索尼曰吾發譚泰擅隱
諭旨罪顧匿圖賴書以庇之乎王問塞爾特因得佐領希
思漢慮譚泰得罪投書於河狀索尼遂昭雪尋復
授二等子索尼終不附睿親王於政事多以理爭
王由是惡之五年以貝子屯齊等訐告索尼於崇
德八年秋與圖賴等謀立肅親王私結盟誓議罪
應死有

旨免死褫職輸贖鍰遣守

昭陵追奪

賞賜八年

上既躬親大政以前議索尼罪不實

特召還朝復其爵遇

恩詔晉三等伯予世襲九年復

命諸王議功晉一等伯

賜敕免死二次擢內大臣兼議政大臣總管內務府事十

七年應

詔上言十一事一曰小民冤抑有司不為詳審者宜別為
嚴察使無壅於

上聞二曰凡犯罪發覺問官以奉有

嚴旨往往不察其情輒加重罪不無枉濫乞

敕法司量情詳慎三曰前議福建將士罪任大將軍者止
削一不世襲之騎都尉而所屬將領其子爵男爵
乃盡議革輕重不均有乖懲勸請

敕更正四曰凡開國之臣自騎都尉以上皆有功行間及

贊成大業者所授之職宜予世襲其後非有戰功
恩詔所加宜不給世襲

敕書五曰在外諸藩風俗不齊若必嚴以內定之例恐反
滋擾宜格外寬容六曰近聞大臣勢豪奪據行市
奸宄之徒投託指引以攘貨財請

旨嚴禁七曰今四方商賈擔負捆載來京者多為旗下大
臣家人短價強買人將畏而不前請察禁八曰諸
王貝勒以及各官私引玉泉山之水為灌溉致竭

泉流當禁九曰邊外木植皆商人僱民採伐水運
解部故額稅之外令自售賣使利及商人今聞大
臣於採木之地私行強佔以致商不聊生請禁止
十曰大臣不殫力公事惟飾第宅請懲禁十一曰
五城審事諸官遇世族富家與窮民構訟必罪窮
民曲意徇私不思執法請嚴飭無得枉情納賄恣
意妄行疏入

上以所奏皆實事宜申禁

飭部議行十八年正月

世祖升遐遺詔以索尼與大臣蘇克薩哈遇必隆鰲拜四人輔政於是索尼及諸臣明誓受事尋蘇克薩哈與鰲拜爭事成隙索尼惡之年已老矣且有疾康熙六年三月與輔臣等奏請

聖祖仁皇帝親政四月

上諭吏部曰輔政大臣伯索尼

太祖高皇帝時黽勉效力

太宗文皇帝任以內外大事悉能果斷殫厥忠誠

世祖章皇帝時亦任以內外大事竭忠純篤以其勲舊忠貞堪受重託

遺詔俾令輔政恪遵

顧命夙夜靖共厥績茂焉今既染疴且復年邁宜特加恩寵以示酬庸之典下王大臣會議晉一等公與前所授一等伯並世襲索尼以寵榮逾分悚仄難安陳情辭一等公爵得

旨嘉獎仍令祇遵

成命不必遜辭是年七月卒

賜祭葬有加禮謚文忠以第五子心裕襲一等伯第六子

法保襲一等公長子噶布喇仕至領侍衛內大臣

十三年十二月

聖祖因

孝誠仁皇后

推恩所生授為一等公第三子索額圖別有傳

希爾根 子喀西泰

希爾根滿洲正黃旗人姓覺爾察世居長白山

太宗文皇帝在藩邸時希爾根任護衛

太祖高皇帝天命十一年春蒙古巴林部貝勒囊努克背盟劫掠大軍進征攻其寨囊努克挾數騎遁希爾根將追及馬蹶易馬突前擊潰敵騎

太宗遂射殪囊努克自是屢從征討有功授騎都尉世職
崇德元年大軍證明分克昌平寶坻順義密雲東

安文安定興安肅容城安州雄縣諸處希爾根任
護軍叅領擊敗明太監高起潛兵擒其總兵巢不
昌又助都統譚泰設伏敗三屯營騎兵師還敵躡
我後諸將護輜重先行希爾根獨以軍殿敘功超
授一等輕車都尉二年四月隨大軍攻克明皮島
九月

上將行圍選從行者希爾根之父雅賴以佐領與選希爾
根因已亦從行啟睿親王多爾袞乞免其父不許

乃使人告都統譚泰謂雅賴已免令珠爾堪代之
及獵

上以珠爾堪不宜與選詰問侍衛索尼奏曰與選者雅賴
希爾根紿言已免行故代以珠爾堪遂下法司鞠
勘希爾根坐欺罔應革世職罷叅領任得

昔從寬罰鍰五年隨睿親王圍明錦州我師據山岡列營
明兵來攻擊走之復敗松山援兵尋以圍錦州時
擅離軍伍及言事不實論罰鍰停止敘功七年大

兵入黃崖口進圍薊州明總兵白騰蛟率兵馳救
希爾根逆擊破之

世祖章皇帝順治二年敘勲舊勞績加一雲騎尉是年隨
英親王阿濟格討流賊李自成由綏德州進圍延
安府賊攻鑲藍旗營希爾根擊却其衆賊將一隻
虎者恃其勇屢犯我營希爾根三戰皆捷遂至西
安同前鋒統領席特庫往躡賊蹤殲賊二隊自成
奔湖廣追勦至安陸府賊踞城拒希爾根與護軍

統領鰲拜攻克之獲戰艦八十移師武昌擊走賊
兵之截我輜重者賊于江濱集艦五百餘將東下
都統譚泰督衆往取希爾根先至獲之凱旋敘功
晉爵三等男世襲三年隨肅親王豪格征流賊張
獻忠與護軍統領哈寧阿阿爾津蘇拜等擊敗賊
黨高汝礪武大定等拒戰兵進擊獻忠於西充別
趨涪州勦賊袁韜俘斬無算師還部議擊獻忠時
哈寧阿被賊圍希爾根弗援妄與阿爾津蘇拜爭

功應論死得

旨從寬罰贖降世職為三等輕車都尉六年隨巽親王滿
達海征大同叛鎮姜瓖希爾根圍太谷以礮破其
城偽知縣李成沛偽都司吳汝器遁追斬之進克
大同及長子縣渾源州朔州復招降永寧州嵐縣
潞安府等城同都統漢岱攻復遼州山西平晉秩
二等尋訴前鑄秩寃得

旨授一等輕車都尉兼一雲騎尉三遇

恩詔晉爵二等男九年擢護軍統領十年與內大臣額爾克戴青等會奏佐領敦達禮岱敏互訐事下法司鞫議削敦達禮世職並罰鍰敦達禮訟寃

命覆勘得釋因論法司誤勘及會奏諸臣徇罪希爾根降爵三等男尋予復如故擢列內大臣更追敘戰功晉爵一等男世襲康熙十二年

聖祖仁皇帝念其宣力有年

詔加太子太保十三年三月授定南將軍討逆藩耿精忠

師次南昌賊已陷廣信建昌撫州九月希爾根督
兵圍撫州賊出城抗拒連敗之復擊走偽都督易
明援兵賊待援不至棄城遁偽將軍陳昇連結土
賊郭應定等犯贛州希爾根令副都統甘度海叅
將塞勒等禦戰陣斬偽總兵柯隆李梁追勦至龍
泉縣破賊三營又攻取曹林十餘寨十四年擊敗
偽將軍邵連登恢復建昌府城移師饒州勦滅餘
干浮梁樂平諸邑賊衆先是

上命安親王岳樂為定遠平寇大將軍統師南昌簡親王喇布為揚威大將軍統師江寧至是

諭趨安親王進征湖南安親王請俟希爾根殲滅饒州廣信賊寇乃規取長沙

上以賊渠吳三桂早滅則江西福建之賊不勦自平趣安親王速進

詔簡親王率江寧兵二千赴南昌以希爾根為副將軍協同鎮守十五年三桂糾賊陷吉安據之希爾根隨

簡親王督師攻圍十六年賊遁城下

詔簡親王鎮吉安希爾根仍駐南昌以年老

召還京十八年五月卒

賜祭葬以其孫尚世特襲爵希爾根之子喀西泰任護軍

叅領當吳三桂初反時隨前鋒統領穆占進征四

川遇賊將王屏藩等于蟠龍山戰方合賊別由水

道登岸來犯喀西泰力戰歿于陣



欽定八旗通志卷一百四十七